



CONVENIO DE COLABORACIÓN ENTRE O SERVIZO GALEGO DE SAÚDE (XERENCIA DA ÁREA SANITARIA DE OURENSE, VERÍN E O BARCO DE VALDEORRAS) E A ASOCIACIÓN GALLEGA DE AFECTADOS POR TRASPLANTES MEDULARES (ASOTRAME GALICIA) PARA O DESENVOLVEMENTO DE PROGRAMAS DE VOLUNTARIADO NO HOSPITAL UNIVERSITARIO DE OURENSE

En Ourense, 20 de maio de 2026

REUNIDOS

Dunha parte, don Antonio Gómez Caamaño, conselleiro de sanidade e presidente do Servizo Galego de Saúde, actuando en representación deste último, de acordo co establecido no artigo 34 da Lei 1/1983, do 22 de febreiro, de normas reguladoras da Xunta e da súa Presidencia, de conformidade cos Decretos 144/2024 e 145/2024 do 20 de maio, polos que se establecen as estruturas orgánicas da Consellería de Sanidade e do Servizo Galego de Saúde, respectivamente; así como co establecido na Lei 1/2016, do 18 de xaneiro de transparencia e bo goberno.

Doutra parte Dna. Cristina Piñeiro Couce, provista de NIF 32691659B, presidenta da *Asociación Gallega de Afectados por Trasplantes Medulares* (en adiante ASOTRAME), con NIF G-70370713 inscrita co nº 2013/017360-1ª no Rexistro Central de Asociacións da comunidade autónoma de Galicia, actuando en nome e representación da mesma en concordancia co disposto polo artigo 31 dos Estatutos da Asociación.

Ambas partes recoñécense reciprocamente capacidade para outorgar o presente acordo e, para estes efectos



EXPOÑEN

I.- Que ASOTRAME é unha organización con personalidade xurídica propia e plena capacidade de obrar para o cumprimento dos seus fins, de carácter benéfico asistencial e sen fin de lucro, que ten como obxectivo a promoción de toda clase de accións e información destinadas a mellorar a situación das persoas con cancro hematolóxico, os seus familiares e contorna social.

De conformidade co artigo 2 dos seus estatutos, ASOTRAME, ten entre as súas funcións prestar apoio as persoas afectadas por un cancro hematolóxico e as súas familias. De conformidade coa súa norma estatutaria, son fins de ASOTRAME, entre outros:

1. Promover a agrupación de todos os pacientes de transplantes medulares que viven en Galicia, e de outros lugares que así o desexen, para poder traballar de forma coordinada na consecución de posibles solucións para mellorar a súa calidade de vida e posibles terapias paliativas ou curativas.
2. Sensibilizar á opinión pública e as Administracións sobre os problemas de prevención, tratamento, curación e asistencia destas enfermidades e promover as medidas e a lexislación adecuada.
3. Desenvolver e difundir a información sobre estas enfermidades aos pacientes, os seus familiares, os profesionais, etc., co fin de conseguir o mellor coñecemento e a implicación dos mesmos.
4. Potenciar todas as canles de información e sistemas de axudas para os asociados a fin de propiciar a integración social dos mesmos.



II.- Que o Servizo Galego de Saúde, a través da xerencia da área sanitaria de Ourense, Verín e O Barco de Valdeorras, é sensible aos fenómenos que poidan redundar nunha maior cohesión social, recoñecendo o importante papel de ASOTRAME. Por iso, sendo consciente da necesidade de promover e coordinar actividades dende postulados flexibles que permitan unhas regras básicas para o desenvolvemento da súa acción, en campos como a saúde, está interesada en colaborar con ASOTRAME. Neste sentido, o 19 de setembro de 2025 asinouse entre o Servizo Galego de Saúde, a Axencia Galega de Sangue, Órganos e Tecidos e ASOTRAME un convenio marco para o fomento da doazón de proxenitores hematopoéticos e acompañamento de pacientes e familiares.

III.- Que co obxecto de desenvolver o convenio marco, o Servizo Galego de Saúde a través da xerencia da área sanitaria de Ourense, Verín e O Barco de Valdeorras, quere fomentar o voluntariado a través de programas de colaboración.

Co propósito de instrumentar unha acción coordinada en tódolos campos de actuación en materia oncolóxica, ámbalas partes, de mutuo acordo, deciden subscribir o presente convenio de colaboración.

IV.- Este convenio de natureza administrativa queda fora do ámbito de aplicación da Lei 9/2017, do 8 de novembro, de Contratos do Sector Público, polo que se traspoñen ao ordenamento xurídico español as Directivas do Parlamento Europeo do Consello de 26 de febreiro de 2014, segundo o establecido no artigo 6.1 da citada lei.

Así, o artigo 6.1 da Lei 9/2017, do 8 de novembro determina que quedan excluídos do seu ámbito de aplicación os convenios, cuxo contido non estea comprendido no dos contratos regulados na mesma ou en normas administrativas especiais, celebrados entre si pola Administración Xeral do Estado, as Entidades Xestoras e os Servizos Comúns da Seguridade Social, as Universidades Públicas, as Comunidades Autónomas e as Cidades Autónomas de Ceuta e Melilla, as Entidades locais, as



entidades con personalidade xurídico pública delas dependentes e as entidades con personalidade xurídico privada, sempre que, neste último caso, teñan a condición de poder adxudicador.

Ademais, a devandita lei condiciona dita exclusión ao cumprimento das seguintes condicións:

a) Que as entidades intervenientes non deben ter vocación de mercado e ademais, queda excluído do convenio a obtención dun beneficio económico directo para as partes.

b) Que o convenio estableza ou desenvolva unha cooperación entre as entidades participantes coa finalidade de garantir que os servizos públicos que lles atinxen se prestan de xeito que se acaden os obxectivos que teñen en común.

c) Que o desenvolvemento da cooperación se guíe unicamente por consideracións relacionadas co interese público.

De conformidade co anteriormente exposto, e sendo concorrente o interese de ambas partes resulta conveniente a colaboración entre elas, polo que deciden formalizar o presente convenio de colaboración en atención ás seguintes:

CLÁUSULAS

Primeira. Obxecto do convenio

1. O presente convenio regula a actuación do voluntariado de ASOTRAME no Hospital Universitario de Ourense co obxectivo de facer máis agradable e levadía a estancia aos pacientes e as súas familias.



2. Proponse por parte da asociación unha oferta de colaboración que incorpora entre outros posibles proxectos futuros, os seguintes:

a) **Proxecto voluntariado na planta de hematoloxía.** Esta iniciativa ten como finalidade facilitar o acompañamento entre persoas que comparten a experiencia da enfermidade oncohematolóxica, poñendo en contacto a unha persoa recentemente diagnosticada ou en proceso activo de tratamento cunha persoa que xa superou a enfermidade. O obxectivo é favorecer o intercambio de vivencias, experiencias e recursos de afrontamento desde unha perspectiva respectuosa e centrada na persoa.

b) **Proxecto luces de cores.** Preténdese integrar nas plantas de hematoloxía dos centros hospitalarios ao longo de todo o ano, o desenvolvemento de talleres creativos e de expresión artística para contribuír na mellora dos pacientes. Esta iniciativa pretende combater a especial dureza do longo ingreso e de determinadas épocas do ano como, por exemplo, o nadal. Realizaranse postais do Nadal, que estarán expostas os meses de decembro e xaneiro e repartiranse posteriormente entre as persoas da planta de Hematoloxía. Ademais, dentro deste proxecto intégranse diferentes propostas como talleres de música levados a cabo por persoas voluntarias.

c) **Como na casa.** Búscase proporcionar unha atención integral e unha vivenda de estancia temporal, a persoas afectadas por algún tipo de patoloxía oncohematolóxica e aos seus familiares. O piso de estancia temporal pretende facilitar un espazo onde as persoas beneficiarias poidan sentirse cómodas e, ademais, paliar o impacto económico que supón desprazarse a outra área sanitaria para recibir un tratamento. Será unha persoa do equipo técnico quen vele polo cumprimento do protocolo interno de funcionamento do piso e da xestión dos recursos da vivenda.



d) **Humanización do andar de hematoloxía.** Realizarase a través de diferentes exposicións ao longo do ano.

3. Será destinatario das actuacións dos proxectos de referencia, tanto o colectivo de pacientes con enfermidades oncohematolóxicas, que reciben tratamento na área Sanitaria de Ourense, Verín e o Barco de Valdeorras como os seus familiares.

Segunda. Compromisos das partes

1. ASOTRAME comprométese a:

a) Achegar un profesional para a Coordinación do Voluntariado que será responsable da actuación dos seus membros e o interlocutor válido ante área sanitaria e a Subdirección de Humanización e Atención á Cidadanía.

b) Achegar o persoal voluntario necesario para a correcta atención dos doentes.

c) Seleccionar e formar aos voluntarios que participen no desenvolvemento da actividade.

d) Achegar unha identificación clara e inequívoca do persoal voluntario.

e) Prover dos seguros de accidentes e responsabilidade civil aos voluntarios.

f) Fomentar a presenza dos voluntarios en todos aqueles foros onde se traten temas relacionados co voluntariado e o cancro adulto e infantil, e nas xornadas de convivencia social que organice ASOTRAME.

g) Realizar as actividades no horario que se estime máis oportuno para non obstaculizar o funcionamento do hospital de modo que as condicións de utilización do inmovible non deben interferir no uso ordinario do mesmo polo órgano que o ten adscrito

h) Garantir que o seu persoal garde o segredo profesional e confidencialidade respecto de calquera información que poida recibir, ou á que poida acceder, directa



ou indirectamente, por calquera medio e circunstancia, como resultado da execución das actividades reguladas polo presente convenio

i) Facer constar na publicidade das actividades o seu carácter gratuíto para o público asistente ou participante e que as ditas actividades son froito do presente convenio de colaboración.

ASOTRAME poderá acordar a substitución das persoas voluntarias polos motivos que se consideren. A este respecto, dende a área sanitaria poderase solicitar a información e documentación que se considere pertinente.

2. O Servizo Galego de Saúde, a través da xerencia da área sanitaria de Ourense, Verín e O Barco de Valdeorras, comprométese a:

a) Facilitar a realización de actividades de animación e de lecer para os pacientes oncolóxicos e os seus familiares.

b) Facilitar a difusión do programa de ASOTRAME a través de folletos e cartelaría (preferiblemente en formato electrónico), proporcionada por ASOTRAME nos lugares máis visibles para as persoas usuarias.

Terceira. Relacións con terceiros

1. Os contratos que ASOTRAME concerte con terceiros non serán fonte de obrigacións para o Servizo Galego de Saúde, nin para a Xerencia da área sanitaria de Ourense, Verín e O Barco de Valdeorras.

A subscrición do presente convenio non supón relación laboral, contractual ou de calquera outro tipo entre o Servizo Galego de Saúde (xerencia da área sanitaria de



Ourense, Verín e O Barco de Valdeorras) e ASOTRAME, ou cos terceiros cos que esta se relacione xuridicamente .

Nin ASOTRAME nin os terceiros cos que esta contrate, gardarán ningún tipo de relación cos profesionais do Servizo Galego de Saúde, con carácter xeral, nin concretamente cos da Área Sanitaria de Ourense, Verín e O Barco de Valdeorras, de tal xeito que ASOTRAME non poderá esixir responsabilidade algunha, nin directa, nin indirecta, por actos ou feitos acontecidos no desenvolvemento do convenio.

O persoal que participe no desenvolvemento do presente convenio seguirá baixo a dirección e dependencia de ASOTRAME, sen que en modo algún tal relación se modifique en virtude do presente convenio.

2. A subscrición do presente convenio non da dereito nin a ASOTRAME, nin aos terceiros con quen esta contrate, ao emprego, uso ou acceso, de xeito directo ou indirecto, de calquera dos sistemas de información sanitaria do Servizo Galego de Saúde, con especial referencia á historia clínica dos pacientes.

3. É responsabilidade de ASOTRAME:

a) Cumprir e facer cumprir as disposicións legais vixentes sobre prevención de riscos laborais , acerca das condicións de seguridade.

b) Cumprir e facer cumprir o segredo profesional e garantir a confidencialidade en relación aos datos persoais do paciente, con especial referencia á categoría especial de datos de saúde, co gallo de dar cumprimento ao establecido na Lei orgánica 3/2018, de 5 de decembro, de protección de datos persoais e garantía dos dereitos dixitais.



Cuarta. Comisión mixta de seguimento

1. Ao obxecto de velar polo cumprimento xeral das cláusulas do presente convenio e coordinar as accións previstas, créase unha comisión mixta entre ASOTRAME e o Servizo Galego de Saúde (xerencia área sanitaria de Ourense, Verín e O Barco de Valdeorras), que estará composta do seguinte xeito:

- a) Por parte de ASOTRAME, pola persoa que ostente a Presidencia da mesma, ou persoa en quen esta delegue, e un técnico nomeado pola presidencia da asociación.
- b) Por parte do Servizo Galego de Saúde, pola persoa titular da Xerencia da área sanitaria, ou persoa en quen esta delegue, así como un técnico nomeado pola Xerencia que actuará como Secretario con voz e voto.

2. Serán funcións xerais desta comisión:

- a) Avaliar o desenvolvemento do presente convenio.
- b) Preparar os sucesivos programas.
- c) Propoñer a prórroga do convenio, a súa modificación ou a súa rescisión.
- d) Estudar e asesorar respecto de cantas cuestións sexan sometidas á comisión por calquera das partes.
- e) As demais previstas no artigo 49 f) da Lei 40/2015, do 1 de outubro, do réxime xurídico do sector público.

3. Esta comisión reunirse cando unha das partes o solicite e nas circunstancias excepcionais que así o aconsellen.

4. Na organización e funcionamento da comisión observaranse as normas previstas na Sección terceira do Capítulo I do Título I da Lei 16/2010, do 17 de decembro, de



organización e funcionamento da Administración xeral e do sector público autonómico de Galicia, relativas ao órganos colexiados.

Quinta. Financiamento

O presente convenio non supón compromiso de gasto para o Servizo Galego de Saúde e por este motivo non precisa consignación orzamentaria.

Sexta. Modificación e extinción

1. O convenio poderá ser modificado a proposta da Comisión de Seguimento do Convenio e previo acordo das partes asinantes.

2. O presente convenio extinguirase pola concorrencia de calquera das seguintes causas, consonte o disposto na Lei 40/2015, do 1 de outubro:

a) O transcurso do prazo de vixencia do convenio sen terse acordado a prórroga do mesmo.

b) Acordo unánime das partes asinantes.

c) Incumprimento das obrigas e compromisos asumidos por algunha das partes. Neste caso, a outra parte poderá notificar á parte incumplidora un requirimento para que cumpra nun determinado prazo coas obrigas ou compromisos que se consideren incumplidos. Este requirimento será comunicado ao responsable do mecanismo de seguimento, vixilancia e control da execución do convenio. Se transcorrido o prazo indicado no requirimento persistise o incumprimento, a parte que o dirixiu notificará á outra parte a concorrencia da causa de resolución e entenderase resolto o convenio.

d) Por resolución xudicial declaratoria da nulidade do presente convenio.

e) Por calquera outra causa prevista na lexislación que resulte de aplicación.



Sétima. Vixencia

O presente convenio entrará en vigor ao día seguinte da súa sinatura e terá unha vixencia de catro anos.

Non obstante, de conformidade co previsto no artigo 49 da Lei 40/2015, do 1 de outubro, as partes, de mutuo acordo, poderán acordar a súa prórroga por un período adicional de ata catro anos mediante a formalización do correspondente acordo de prórroga, que deberá ser subscrito con anterioridade á data de vencemento do convenio.

Oitava. Publicidade

1. A sinatura deste convenio leva implícito o consentimento expreso das persoas que interveñen para que a Administración pública autonómica galega poida facer públicos os datos de carácter persoal e calquera outras especificacións que figuren nel, de acordo co disposto na Lei 19/2013 de 9 de decembro, de transparencia, acceso á información pública e bo goberno, e a Lei galega 1/2016, de 18 de xaneiro, de transparencia e bo goberno.

2. O presente convenio será obxecto de inscrición no Rexistro de Convenios da Xunta de Galicia, nos términos previstos no Decreto 126/2006, de 20 de xuño, polo que se regula o Rexistro de Convenios da Xunta de Galicia.

Novena. Protección de datos

1. De conformidade co establecido no Regulamento (UE) 2016/679 do Parlamento Europeo do Consello de 27 de abril de 2016 relativo á protección das persoas físicas



no que respecta ao tratamento de datos persoais e á libre circulación destes datos e polo que se derroga a Directiva 95/46/CE así como na Lei Orgánica 3/2018, de 5 de decembro de Protección de Datos Persoais e Garantía dos Dereitos Dixitais, as partes comprométese a gardar a máis estrita confidencialidade respecto de calquera das informacións, datos e documentación de carácter persoal á que teñan acceso en virtude do presente convenio e ao deber de gardalos, sen que poidan ser utilizados para usos diferentes aos previstos no mesmo, facendo constar de maneira expresa que velarán polo cumprimento da normativa de protección de datos persoais de aplicación en cada caso. Estas obrigas subsistirán incluso despois de rematado o convenio.

2. En relación co tratamento dos datos que non teñan o carácter de persoal e que resulten precisos para satisfacer os fins que fundamentan o presente convenio, será de aplicación o disposto no Regulamento (UE) 2018/1807 do Parlamento Europeo e do Consello, do 14 de novembro de 2018, relativo a un marco para a libre circulación de datos non persoais na Unión Europea.

Décima. Natureza xurídica e xurisdición

1. O presente convenio ten natureza administrativa e rexerese pola Lei 40/2015, de 1 de outubro e pola lexislación sobre a materia obxecto do mesmo, así como polo establecido na Lei 1/2016, de 18 de xaneiro.

2. Segundo o previsto no artigo 6.1 da Lei 9/2017, de 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, é un negocio xurídico excluído do seu ámbito de aplicación.



De conformidade co artigo 4 desa mesma norma, este convenio rexerese polas súas normas especiais, aplicándose os principios desta Lei para resolver as dúbidas e lagoas que puidesen presentarse.

3. As partes comprométense a resolver de maneira amigable calquera desacordo que puidera xurdir no desenvolvemento do presente convenio. As cuestións litixiosas que poidan xurdir na interpretación ou no incumprimento das obrigas que se deriven do presente convenio, e que non poidan ser dirimidas pola Comisión de seguimento creada para tal efecto, quedarán sometidas á xurisdición contencioso administrativa, de conformidade coa Lei 29/1998, do 13 de xullo, reguladora da xurisdición contencioso-administrativa.

En proba de conformidade con canto antecede, asinan o presente convenio, por duplicado exemplar, no lugar e data indicados no encabezamento.

Presidente do Servizo Galego de Saúde
(P.D. de sinatura, 13 de maio de 2026)
Xerente da Área Sanitaria de Ourense,
Verín e O Barco de Valdeorras

Presidenta de ASOTRAME

José Santiago Camba Bouzas

Cristina Piñeiro Couce

